

四庫全書

史部

欽定四庫全書

皇朝文獻通考卷七十七

職官考一

臣等謹按自古帝王體國經野因人事以授官馬  
考所載漢唐之迹備矣宋承唐制階品煩多雖正  
官非別勅不治本司事當時朝士頗議之而終不  
能革遼設南北面諸官以理庶務金建三省頒新  
制換官格雖因俗之治亦一代之規也元初命劉

秉忠許衡等酌古今之宜定內外之官典制綦備  
大德以後爵賞滋繁名器日濫焉明太祖罷丞相  
以部府諸司理天下事亦漢九卿遺意未造批答  
歸之寺人軍紀司於紈袴豈立法之始意乎

本朝創制顯庸典章明備

國初首設八旗天命十一年設八大臣及十六大臣  
自是定官制建六部内外文武綱舉目張

世祖章皇帝混一寰宇大小官制相維蓋監前代而損益

之而內而八旗各部院外而督撫提鎮滿漢並用  
文武兼資補缺汰浮因革盡善

列聖相承凡所以綜覈名實澄敘官方因時以制宜者無  
弗周備我

皇上耆定功成旼章式廓設官置吏中外相維是以萬  
里之遙若臂指之相使兆民之衆若呼吸之可通  
官習其事民安其教求之漢唐極盛之時未聞整  
齊畫一有如此者而又何論於前五朝乎謹依前

考例首載建置規模詳稽各官之裁設職掌附以  
祿品之制作職官考

官制

太祖高皇帝辛丑年以

開國之初凡出兵校獵不計人之多寡各隨族黨屯寨  
而行獵時每人各取一矢凡十人設一長領之各  
分隊伍其長稱為牛录額真至是遂以名官凡三  
百人為一牛录每牛录設額真一

甲寅年時復以削平諸國每五牛录設一札蘭額  
真五札蘭額真設一固山額真每固山額真左右  
設兩梅勒額真初設有四旗旗以純色為別曰黃  
曰紅曰藍曰白至是增設四旗參用其色鑲之共  
為八旗又置理政聽訟大臣五人札爾固齊十人  
凡有聽訟之事先經札爾固齊十人審問然後言  
於五臣五臣再加審問然後言於諸貝勒衆議既  
定奏明三覆核之

天命五年分總兵官品級為三等其副將叅將遊擊亦如之衆牛录額真俱為備禦官每牛录下設千總四人

十一年

太宗文皇帝嗣位設八大臣為固山額真每旗一人與諸貝勒偕坐議事凡出獵行師各領固山兵以行又設十六大臣每旗二人料理國政審斷訟獄不令出兵駐防又設十六大臣亦每旗二人出兵駐防

仍行差遣居則審理詞訟

天聰五年設六部官每部設一員勤主之吏部設承  
政一員戶禮兵刑工五部承政各二員蒙古承政  
六部各一員漢承政吏戶禮兵工五部各一員刑  
部二員每部各設叅政八員啟心郎一員工部增  
設漢叅政二員蒙古叅政二員漢啟心郎二員其  
辦事筆帖式各酌量繁簡補授凡稱榜式俱著停  
止稱為筆帖式如

欽賜榜式名者仍稱榜式

八年

諭曰朕聞國家承天創業未有棄其國語反習他國之語者棄國語而效他國其國亦未有長久者也蒙古諸貝子棄蒙古之語名號俱學喇嘛卒致國運衰微今我國官名俱因漢文從其舊號夫知其善而不能從知其非而不能省俱未為得也凡我國官名俱易以滿語勿仍襲總兵副將叅將遊擊備禦等舊名定五備禦之總兵

為一等公一等總兵官為一等按班章京二等總兵官  
為二等按班章京三等總兵官為三等按班章京一等  
副將為一等梅勒章京二等副將為二等梅勒章京三  
等副將為三等梅勒章京一等叅將為一等札蘭章京  
二等叅將為二等札蘭章京遊擊為三等札蘭章京備  
禦為牛录章京代子為分得撥什庫章京為小撥什庫  
旗長為專達屯撥什庫仍為屯撥什庫凡管理不論官  
職管固山者即為固山額真管梅勒者即為梅勒章京

管札蘭者即為札蘭章京管牛录者即為牛录章京管  
已雅喇堆額真即為堆章京管已雅喇札蘭額真即為  
札蘭章京嗣後俱照我國新定者稱之若不遵我國所  
定之名仍稱漢字舊名者是不奉國法恣行悖亂者也  
查出決不輕恕

九年設蒙古八旗官員先是八年以和碩貝勒德  
格勒等所獲察哈爾國千餘戶分給八旗是年正  
月復以察哈爾來歸官兵均隸各旗至是始編審

蒙古壯丁及在內舊喇嘛沁壯丁為蒙古八旗每  
旗設固山額真一人梅勒章京札蘭章京各二人  
及佐領驍騎校等官

臣等謹按此設蒙古八旗之始也官制悉與滿洲  
同

十年以

國初設立文館至是改為內三院曰內國史院曰內秘  
書院曰內宏文院各設大學士一人

順治元年增設內三院學

士各一人二年以翰林官分隸之稱內翰林國史院內翰林秘書院內翰林宏文院增侍讀學士侍讀等官各分其事為職掌內國史院職掌記注

詔令收藏

御製文字凡用兵行政事宜編纂史書撰擬郊

天告祝文及

陞殿宣講慶賀表文纂修

祖宗實錄撰擬礦志文編纂機密文移及各官章奏掌記

官員升降文冊撰功臣母妻

誥命印文追贈諸貝勒

冊文凡六部事宜入史冊選擇記載一應遠方往來書札俱編入史冊內秘書院職掌撰外國往來書札並錄各衙門奏疏及詞狀撰擬

勅諭祭文內宏文院職掌注釋歷代行事善惡進講御前侍講

皇子並教諸親王頒行制度

崇德元年設都察院

二年

命固山貝子尼堪等與議政事每旗設三員以鞏阿岱等  
為議政大臣復集和碩親王多羅郡王多羅貝勒  
固山貝子固山額真都察院承政及新設議政大  
臣

諭之曰議政大臣或出兵或在家向時甚少若遇各處差  
遣則朕左右及王貝勒之前竟無議事之人矣議政雖  
乏人然不令妄與會議者以卑微之人叅議國家大事

彼必逢迎其主且以賢能自居諂諛之詞既悞其主復悞國政今特選擇以爾等為賢置於議事之列正欲令各念其主為國効力耳

三年定蒙古衙門為理藩院

又定部院官制先是六部都察院理藩院各設承政三四員其餘皆為叅政官止二等至是范文程等奏請每衙門止設滿洲承政一員以下酌量設左右叅政理事官副理事官額哲庫各官凡五等

上可其奏更定八衙門官制六部理藩院都察院承政各  
一員吏部左叅政二員右叅政三員理事官四員  
副理事官六員戶部左叅政二員右叅政四員理  
事官十員副理事官十六員禮部左叅政二員右  
叅政三員理事官四員副理事官七員兵部左叅  
政二員右叅政三員理事官十員副理事官十六  
員刑部左叅政二員右叅政三員理事官六員副  
理事官八員工部左叅政二員右叅政三員理事

官九員副理事官十二員啟心郎每部三員滿一員漢二員額哲庫每部二員理藩院左右叅政各一員副理事官八員啟心郎一員都察院左右叅政各二員理事官六員滿漢蒙古各二員

七年定漢軍八旗官員先是二年分烏真超哈為二固山每固山設固山額真一人編壯丁為牛录旗用元青色四年分為四固山每固山增設梅勒章京二人扎蘭章京四人牛录章京十八人共三

旗以黃白紅色鑲之一旗純用元青色至是始編為八旗增設各官其色與滿洲同

八年設守

陵官

停諸王貝勒管理部院

順治元年

世祖章皇帝定鼎燕京定内外文武官制内官自閣部以至庶司外官藩臬守令提鎮將弁畧仿明制而損

益之兼用滿漢人

詳見後  
各官下

三年罷織造太監

四年更定八旗官名禮部遵

諭議定固山額真按班章京堆章京梅勒章京扎蘭章京

牛录章京噶布什賢噶拉按班噶布什賢章京皆

係管兵官銜不論世職大小有授此官者即照此

銜稱之凡箭號等項亦書此銜於上其世職按班

章京改為精奇尼哈番梅勒章京改為阿思罕尼

哈番扎蘭章京改為阿達哈哈番牛录章京改為  
拜他拉布勒哈番半個前程改為拖沙喇哈番其  
在部院官員各省駐防章京官銜仍照舊

八年復

命諸王貝勒管理部院

九年復停諸王貝勒管理部院

十年給事中劉顯績奏請設立記注官凡

皇上詔諭一言一動及諸臣奏啟俱隨事直書以為萬世

法則報聞

罷各省巡按

臣等謹按各省巡按專以察吏安民為要迨其後多受屬員獻媚叅劾無聞鄭親王濟爾哈朗請停

此差從之

詳見後都察院下

十五年裁尚寶司初設卿少卿等官順治元年裁二年以給事中朱徽疏請復設如舊至是

諭吏部曰向以官制宜備設立尚寶司衙門滿漢文官專

理用寶事務朕近見該司事簡員多且既有尚寶監承  
收又經內三院看用該司理事副理事卿丞等官似皆  
可省今暫行裁之各官照品改用

又

諭大學士覺羅巴哈納等曰朕思大理寺衙門所管事務  
無多不過三法司會議時少有事耳此等事堂上官三  
人辦理足矣工部衙門有左右侍郎部中諸事郎中主  
事同辦之其總理稽查則左侍郎辦之有餘即無右侍

郎亦何不可中書科中書舍人所管事務有何繁劇允  
宜裁汰至於道員管理事務繁多當增員不可復汰科  
員甚多全無職掌一科中用都給事中等足矣設漢軍  
副理事官何為原因從外行取不遇御史員缺故改用  
耳又在外布政司衙門左布政使事繁右布政使有何  
職掌此非冗員而何內外官員中此等冗員甚多但部  
院堂官不肯詳察豈有本衙門官不知其有用無用者  
乎漢官動稱總兵官及各武官併無用兵丁應行裁汰

有肯將文職裁汰者乎此皆伊等偏執之處爾等可將朕諭傳諭議政王貝勒大臣九卿詹事科道等官當此錢糧匱乏之時故爾暫行裁汰嗣後錢糧充裕再行增設未為晚也

又

諭吏部曰自古帝王設官分職共襄化理所關甚鉅必名義符合品級畫一始足昭垂永久用成一代之典本朝設內三院有滿漢大學士學士侍讀學士等官今斟酌

往制除去內三院秘書宏文國史名色大學士改為殿閣大學士仍俱正五品照舊例兼銜設立翰林院設掌院學士一員正五品照舊例兼銜除掌印外其餘學士亦正五品以上現任各官俱照本品改銜供職以後陞授銜品俱照新例內三院舊印俱銷毀照例給印內閣滿字稱為多爾吉衙門漢字稱為內閣翰林院滿字稱為筆特黑衙門漢字稱為翰林院其侍讀學士以下員數官銜滿名照漢官稱謂通著察例詳議具奏六部滿

漢尚書俱作正二品滿字仍稱阿里哈按班漢字仍稱尚書滿漢侍郎俱作正三品滿字仍稱阿思哈尼按班漢字仍稱侍郎理事官滿字稱為伊齊轄喇哈番漢字稱為郎中俱作正五品副理字官滿字稱為愛什拉庫哈番漢字稱為員外郎俱作從五品額哲庫哈番滿字仍稱為額者庫哈番漢字稱為主事俱作正六品司務添設滿官漢字仍稱為司務滿字稱為他庫喇布勒哈番俱作從九品都察院左都御史滿字稱為哈思呼額

爾機阿里費拜察喇按班漢字稱為左都御史俱作正  
二品左副都御史滿字稱為哈思呼額爾吉阿思罕尼  
拜察喇按班漢字稱為左副都御史俱作正三品左僉  
都御史滿字稱為哈思呼額爾吉阿達費拜察喇按班  
漢字稱為左僉都御史俱作正四品監察御史滿字稱  
為拜察默拖喇哈番漢字稱為監察御史俱作正七品  
經歷改為司務添設滿官漢字稱為司務滿字稱為他  
庫喇布勒哈番俱作從九品通政使司通政使滿字稱

為阿里費哈番布勒哈番漢字稱為通政使俱作正三  
品左通政滿字稱為哈思呼額爾吉哈番布勒哈番漢  
字稱為左通政俱作正四品右通政滿字稱為伊齊額  
爾吉哈福布喇哈番漢字稱為右通政俱作正四品左  
叅議滿字稱為哈思戶額爾機愛什拉喇哈番漢字稱  
為左叅議俱作正五品右叅議滿字稱為依齊額爾機  
愛什拉喇哈番漢字稱為右叅議俱作正五品經歷改  
為司務添設滿官漢字稱為司務滿字稱為他庫喇布

勒哈番俱作從九品大理寺卿滿字稱為阿里哈哈番  
漢字稱為卿俱作正三品少卿滿字稱為伊勒希哈番  
漢字稱為少卿俱作正四品寺丞滿字稱為希喇默哈  
番漢字稱為寺丞俱作正五品寺正滿字稱為伊齊轄  
庫漢字稱為寺正俱作正六品寺副滿字稱為愛什拉  
庫漢字稱為寺副俱作從六品評事滿字稱為額哲庫  
漢字稱為評事俱作正七品司務添設滿官漢字仍稱  
為司務滿字稱為他庫喇布勒哈番俱作從九品各衙

門現任官俱照本品改銜供職以後陞除銜品俱照新制這改定官名通行傳諭各衙門滿漢啟心郎原因諸王貝勒管理部院事務而設今宗人府啟心郎仍照舊其餘部院滿漢啟心郎俱著裁去照原品另用其太常寺等衙門滿漢官名品級著一併議畫一具奏

十六年更定在京各衙門滿漢官銜品級翰林院侍讀學士侍講學士侍讀侍講修撰編修檢討五經博士典簿滿漢字俱同稱內閣撰文中書辦事

中書滿漢字俱同稱以上品級仍舊宗人府府丞  
啟心郎理事官正四品副理事官從四品稱謂仍  
舊六部滿漢尚書侍郎郎中員外郎主事司務等  
官稱謂品級俱仍舊兵部督捕侍郎稱謂品級仍  
舊左右理事官俱改為太僕寺少卿仍協理兵部  
督捕堂上事務正四品理藩院尚書稱禮部尚書  
掌理藩院事正二品左右侍郎稱禮部左右侍郎  
協理理藩院事正三品副理事官從五品院判仍

正六品知事副使稱謂品級如舊都察院左都御史左右副都御史左右僉都御史監察御史等官稱謂品級俱仍舊滿理事官改稱監察御史正七品都事正六品司務從九品稱謂仍舊通政使司通政使左右通政左右叅議等官稱謂品級俱仍舊知事正七品司務從九品稱謂仍舊大理寺卿左右少卿寺丞寺正寺副評事等官稱謂品級俱仍舊司務從九品稱謂仍舊六科都給事中左右

給事中給事中稱謂品級仍舊太僕寺滿理事官  
漢卿俱稱卿滿副理事官漢少卿俱稱少卿主簿  
稱謂品級仍舊光祿寺滿理事官漢卿俱稱卿滿  
副理事官漢少卿俱稱少卿寺丞四署掌印署正  
典簿稱謂品級仍舊國子監祭酒司業監丞助教  
博士典簿學正學錄典籍稱謂品級仍舊欽天監  
監正監副春官正夏官正秋官正冬官正中官正  
五官靈臺郎五官保章正主簿五官挈壺正五官

監候五官司歷五官司晨博士太醫院院使院判  
御醫吏目上林苑監左右監丞署丞中書科中書  
舍人行人司司正司副行人以上稱謂品級俱仍  
舊戶禮兵工四部各庫司庫正七品稱謂仍舊禮  
部會同館通事滿字稱通事漢字稱通官正八品  
管牛羊官滿字稱烏爾哈伯喀達拉喇哈番漢字  
稱司牲官正八品禮部鑄印局戶部寶泉局兵部  
會同館大使兵部督捕刑部司獄工部營繕所丞

稱謂品級仍舊

十七年定八旗官漢字官名議定固山額真漢字稱為都統梅勒章京漢字稱為副都統扎蘭章京漢字稱為叅領牛录章京漢字稱為佐領烏真超哈漢字稱為漢軍

十八年罷十三衙門以其事歸內務府順治十一年裁內務府置十三衙門曰司禮監尚方司御用監御馬監內官監尚衣監尚膳監尚寶監司設監

兵仗局惜薪司鐘鼓司織染局十二年改尚方司  
為尚方院十三年改鐘鼓司為禮儀監尚寶監為  
尚寶司織染局為經局十七年改內官監為宣徽  
院禮儀監為禮儀院至是年

聖祖仁皇帝御極諭吏部刑部等大小各衙門朕惟歷代  
理亂不同皆係用人之得失大抵委任官寺未有不召  
亂者加以僉邪附其間則為害尤甚我

太祖

太宗痛鑒往轍不設宦官

先帝以宮闈使令之役偶用斯輩繼而深悉其奸是以

遺詔有云

祖宗創業未嘗任用中官且明朝亡國亦因委用宦寺朕

凜承

先志釐剔弊端因而詳加體察乃知滿洲佟義內官吳良  
輔陰險狡詐巧售其奸熒惑欺朦變易

祖宗舊制倡立十三衙門名色廣招黨類恣意妄行錢糧

借端濫費以遂侵牟權勢震於中外以竊威福恣肆貪婪相濟為惡假竊威權要挾專擅內外各衙門事務任意把持廣興營造糜冒錢糧以致民力告匱兵餉不敷此二人者朋比作奸撓亂法紀壞本朝淳樸之風俗變祖宗久定之典章其情罪重大稔惡已極通國莫不知之雖置於法未足蔽辜吳良輔已經處斬佟義若存法亦難貸已服冥誅著削其世職十三衙門盡行革去凡事皆遵

太祖

太宗時定制行內官俱永不用又劉正宗亦當仰遵

遺詔置之重典但念其年老姑從寬免其黨類亦皆赦宥  
爾等即傳布中外刊示曉諭咸使知悉用昭除奸瘴  
惡大法

臣等謹按馬考及五朝續考皆詳載內侍之職我  
世祖章皇帝定鼎之初減定內官額數後雖有十三衙門  
之設旋即永行裁革康熙十六年五月置敬事房

設總管副總管雍正元年九月定故事房總管為  
四品副總管為六品隨侍等處首領為七品宮殿  
等處首領為八品四年六月復定正四品大總管  
為宮殿監督領侍銜從四品大總管為宮殿監正  
侍銜六品副總管為宮殿監副侍銜七品首領為  
執守侍銜八品首領為侍監銜尋又定內官品級  
自四品至八品俱不分正從永為定例乾隆七年  
我

皇上欽定宮中則例凡內監官職以現今四品為定再  
不加至三品二品以至一品蓋

列聖相承止以供使令之役從未干預外事傳為  
家法實三代以下所未有也故不別立宦官一門

又

諭吏部曰內三院衙門自

太宗皇帝時設立今應仍復舊制設內秘書院內國史院  
內宏文院其內閣翰林院名色俱停罷內三院應設滿

漢大學士學士等官爾部即開列銜名具奏

康熙二年

詔修品級考從給事中胡聖愈請也至十年告成頒示中

外

臣等謹按品級考嗣於雍正十年乾隆二十二年  
重修會典時復加更訂

裁苑馬寺卿一員主簿一員監正七員

五年定各部院清漢字主事員缺並補授之法吏

部議本年四月內奉

旨凡部院清字主事漢字主事缺出俱論旗補授查內院  
宗人府各部院清字主事共二十五員漢字主事  
共二十三員蒙古主事共三員漢軍主事共十四  
員其清字主事二十五員每旗應設三員所餘一  
缺論首旗應歸鑲黃旗內其漢字主事二十三員  
每旗應設三員因鑲黃旗多設清字主事一員止  
設二員其漢軍主事十四員正藍旗鑲藍旗各設

一員餘六旗各設二員內三院蒙古主事三員不論旗分將應陞補之人坐名補授其各部院主事仍照定例聽該部院坐名補授如本衙門無應補之人將本旗內應補部院人員坐名題補清字主事缺出將清字筆帖式應陞之人移送漢字主事缺出將漢字筆帖式應陞之人移送從之

六年吏部議覆左都御史王熙奏戶部關倉等差工部抽分蘆政造船等差俱歸併地方官應將戶

部主事裁減十員工部主事裁減七員從之

九年

諭吏部曰滿漢大臣官員職掌相同品級有異應行畫一著議政王貝勒大臣會同定議具奏尋議舊例滿洲大學士尚書左都御史俱係一品侍郎學士副都御史通政使大理寺卿俱係二品漢大學士原係正五品今為二品尚書左都御史俱係二品侍郎學士副都御史通政使大理寺卿俱係三品滿洲郎

中係三品員外郎係四品漢郎中係正五品員外郎係從五品順治十五年曾將滿洲官員品級與漢人畫一康熙六年改為照舊今應仍照順治十五年之例其現在品級仍准存留以後補授之時照此定例補授從之

改內三院為內閣設翰林院如舊制

十五年增設直隸各省儒學教職各一員

三十七年裁上林苑監初設漢監丞一員所屬林

衡嘉蔬良牧蕃育四署漢署丞各一員順治十五年裁林衡嘉蔬署丞二員至是監丞及良牧蕃育二署悉裁之

三十九年吏部等衙門會議直隸各省督撫題裁閒冗官員直隸井陘道口北道山東青州道浙江金衢嚴道福建督糧道及直隸各省屯都司同知通判布政使司理問都事照磨按察使司照磨檢校都司斷事衛經歷州同州判縣丞府照磨知事

金史卷之六十七  
卷六十七  
司獄巡檢驛丞倉庫大使所官等共三百三十六員俱應照各督撫等所題裁汰得

旨口北道缺不必裁餘依議

五十七年

命部院增設蒙古官增蒙古旗分御史二員六部郎中六員員外郎八員主事六員

雍正元年

世宗憲皇帝諭吏部八旗滿洲翰林向無陞轉之途深為

可憫伊等如何陞轉之處著議奏尋議嗣後翰林院滿洲侍讀侍講諭德洗馬國子監司業缺出將各部俸滿應陞之人補授一員將翰林院編修檢討補授一員分缺補用從之

又

詔訪明代後裔襲封一等侯

諭曰朕近於

聖祖仁皇帝所貽書笥內檢得未經頒發

上諭一道以明太祖崛起布衣統一方夏經文緯武為漢唐宋諸君之所未及其後嗣亦未有如前代荒淫暴虐亡國之迹欲大廓成例訪其支派一人量授官職以奉春秋陳薦仍世襲之朕伏讀之下仰見我

聖祖仁皇帝海涵天覆大度深仁遠邁百王超軼萬古朕思史紀東樓詩歌白馬商周以來無不推恩前代後世類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

上諭頒發爾等訪求明太祖支派子姓一人量授職銜俾之承襲以奉春秋祭享但恐有明迄今年代久遠或有奸徒假冒致生事端爾內閣大學士即會同廷臣詳明妥議以副

聖祖仁皇帝寬仁矜恤之至意尋遵

旨查明代後嗣鑲白旗漢軍知府朱之璉等六人引見以朱之璉為一等侯

又

諭翰林院

皇考聖祖仁皇帝設日講起居注官於詞臣中擇其才品  
優長者以原官充補嗣恐史官或多溢美之詞故康熙  
五十六年以後裁省記注止令翰林文員於理事時輪  
侍班行凡有重務要旨仍令內閣記而存之意至深也  
至朕繼承大統上繼

皇考功德之隆顧惟涼德負荷為難今御門聽政之初益

當寅畏小心簪筆侍臣何可缺歟當酌復舊章於朕視  
朝臨御祭禮

壇

廟之時令滿漢講官各二人侍班其仍復日講起居注官  
如康熙五十六年以前故事爾衙門即遵旨行

臣等謹按是年十一月吏部議奏

日講起居注官出差非陞任可比侍班員少請將  
翰詹等員署理仍開列請

旨候該員差滿回京署員仍回本任從之

又

諭翰林院凡各部院衙門俱設司官定稿說堂筆帖式專管繙譯廳官專管收發文書翰林院衙門亦有錢糧出入陞遷議敘并各衙門文移往來事務繁瑣關係非輕乃俱出自筆帖式典簿廳之手豈得保無弊端嗣後於俸淺編修檢討內擇才守優長者滿漢各二員充作司官專主定稿說堂

又

諭以邊外地方遼闊開墾田畝甚多將京城無產業兵丁  
移駐於彼總理事務王大臣等會同兵部詳議具奏尋  
議熱河喀喇和屯樺榆溝三處駐兵派京城兵  
八百名熱河駐四百名喀喇和屯樺榆溝二處各  
駐二百名以五十名為一佐領每佐領設佐領一  
員驍騎校一員於派出兵丁內設領催四名再設  
總管一員翼長二員令其統理管轄其總管駐劄

熱河翼長二員分駐喀喇和屯樺榆溝二處

又

諭戶部各倉監督向有年限滿漢一同更換立法最善唯通州坐糧貯有通濟庫關係錢糧數十萬兩而坐糧廳一差並無年限或滿員或漢員陞轉則更漢員滿漢參差更換彼此牽制迴護勢難徹底澄清爾部可將通濟庫錢糧確查明晰其坐糧廳一差或限二年或限三年滿漢一同更換即確議具奏尋議三年一次滿漢一同

更換從之

二年

命左右兩翼各立宗學一所揀選宗室四人為正教長十六人為副教長

復設太僕寺主簿一員并給官房一所為太僕寺衙門從兵部侍郎兼理太僕寺事務伊都拉請也又撫遠大將軍年羹堯疏奏寧夏駐劄滿洲兵丁之處應設將軍一員副都統二員滿洲協領四員

蒙古協領二員每旗滿洲佐領各二員蒙古佐領各一員每佐領下防禦各一員驍騎校各一員八旗共派駐防兵二千二百名又八旗應添步兵一千二百名左右兩翼添放防禦各一員令其管轄步兵看守城池倉庫於馬甲內擇其漢仗好者令為前鋒寧夏既駐滿洲兵丁應設理事同知一員從之

三年領侍衛內大臣前鋒統領護軍統領等處設

其次辦事官

定內閣侍讀學士翰林院講讀學士等官品級內閣侍讀學士翰林院侍讀學士侍講學士為從四品翰林院侍讀侍講為從五品從內閣學士班第請也

四年添設內閣漢侍讀二員照滿洲蒙古漢軍侍讀品級授為正六品

設觀風整俗使九卿奉

詔議仿唐貞觀中置觀風整俗使巡省天下觀風俗之得失今遣官前往浙江省問風俗授為浙江等處觀風整俗使鑄給關防以重職守至七年福建廣東各設觀風整俗使一人尋俱停罷

又添設中倉南倉滿漢監督戶部議覆倉場侍郎托時等議御史殷式訓條奏漕務各款一各倉例設滿漢監督各一員辦理倉務中倉南倉相隔一城一倉一人難於查看應於中倉添設漢監督一

員南倉添設滿監督一員可無顧此失彼之虞應如所請從之

五年

盛京戶部刑部工部添設漢郎中各一員員外郎各一員主事各一員從監察御史傳色納請也

又

諭兵部前科武進士大半皆授為侍衛餘亦依次俱得選用今科進士朕恐其多選侍衛反不能盡心學習所以

揀選侍衛者甚少但伊等未得一時錄用置之閒散殊為可惜今特廣為加恩將未選侍衛之滿洲蒙古進士授為藍翎交與領侍衛內大臣効力行走漢軍進士交與該旗以驍騎校補用其餘漢進士有人材可用者分發各省賞食千總俸命督撫提鎮試看如果材力勇壯効力勤謹者以守備題補

六年定理藩院補用人員各條例吏部議覆理藩院尚書特古忒等奏稱理藩院專司蒙

古事務非通曉蒙古字話之人不能辦理請  
於八旗蒙古官學生監生內有能繙譯滿洲蒙古  
字話者吏部會同理藩院考取以各部院蒙古筆  
帖式挨次補用蒙古特學生由理藩院考試繙譯  
蒙古唐古特字話揀選好者以理藩院唐古特筆  
帖式挨次補用又唐古特學生補用筆帖式中書  
者仍兼唐古特學行走陞至主事員外方令其離  
學廡所學唐古特字不致荒廢又舊例蒙古官學

生唐古特學生補用中書似屬太優嗣後官學生  
停其補用中書中書缺出於八旗蒙古筆帖式內  
揀選補用至內閣蒙古中書額設十六缺內有唐  
古特中書四員查內閣繙唐古特字話既設巴克  
什喇嘛並不專藉中書請於唐古特中書內裁去  
二缺止留二缺令唐古特學生出身之筆帖式補  
用其蒙古中書十二員令理藩院會同內閣於八  
旗蒙古筆帖式內考試擬定正陪咨送吏部引

見補用此補授中書人員內由理藩院蒙古筆帖式考取者仍以理藩院應陞之缺陞轉由吏部等衙門考取者仍以吏部等衙門應陞之缺用又國子監八旗蒙古官學生監生學習滿洲蒙古繙譯既各蒙恩賞給錢糧其內蒙古學實屬多設請將內蒙古學裁去其裁退之學生俟國子監本旗學生缺出坐補其裁退之助教俟國子監助教缺出坐補又八旗蒙古監生官學生內有學習漢文情願考試滿漢繙

譯者令其考試取中後以吏部等衙門蒙古筆帖式取中人員一體挨次補用又理藩院內額設郎中五員員外郎十九員主事五員係專司蒙古事務取其諳練不使將別部人員陞補亦未可陞補別部嗣後理藩院缺出請於理藩院蒙古筆帖式各口驛站及將軍駐防並察哈爾等處蒙古筆帖式并由理藩院筆帖式考取補用之中書助教五官正等不論旗分通行較俸陞補由主事陞補本

院員外郎郎中再與六部滿洲蒙古郎中一體較俸  
陞轉又內閣蒙古侍讀二員太僕寺蒙古員外郎二員  
盛京刑部蒙古員外郎二員亦係專司蒙古事務之  
人嗣後缺出請於理藩院蒙古主事內不論旗分  
通行較俸陞補又八旗游牧員外郎主事仍照舊  
例由理藩院於蒙古護軍校驍騎校中書筆帖式  
護軍內揀選補放又喜峯口殺虎口驛站員外郎  
各一缺張家口歸化城蒙古理事同知各一員原

係揀選之缺應照定例於理藩院司官揀選補授  
又國子監助教八員係訓迪滿洲蒙古繙譯之員  
嗣後遇缺於理藩院及修書蒙古筆帖式并國子  
監閒散巴克什內令理藩院會同國子監揀選擬  
定正陪咨送吏部帶領引

見補用又欽天監蒙古五官正二員原係考選之缺請照  
例於內閣蒙古中書八旗蒙古筆帖式內考選咨  
部引

見補用又六部蒙古郎中員外郎主事都察院監察御史  
原俱係理藩院六部蒙古人員通行陞補之缺今  
理藩院人員既不令其陞轉別部嗣後六部蒙古  
主事缺出請將吏部等衙門蒙古筆帖式及中書  
五官正等不論旗分通行較俸陞補又理藩院司  
官筆帖式內有不通曉蒙古字話又不通曉漢文  
者交與該堂官甄別令其回旗以對品旗員補用  
其不繙譯字話而能通曉滿漢繙譯之員令該堂

官咨部註冊俟彙齊人數吏部奏請

欽點閱卷大臣公同考試果係繙譯精通者准其於六部  
司官筆帖式等通行較俸以應陞之缺陞補俱應  
如所請從之

七年添設八旗都統衙門司務每旗二員從正紅  
旗漢軍副都統朱國極請也

又添設八旗都統衙門左右二所每旗於叅領副  
叅領內揀選二員引

見授受掌管關防從正紅旗滿洲副都統宗室鄂齊請也  
定滿漢科道品級六科給事中俱為正五品各道  
御史滿洲例由員外郎陞授漢軍例由郎中陞授  
俱為正五品漢御史由內閣侍讀翰林院編修檢  
討各部郎中員外郎補授者為正五品由主事中  
行評博行取知縣補授者為正六品著為令

八年復設漢中書四員大學士疏言雍正七年十一月奉  
旨內閣本章各於正本之外立一副本另行收貯以備

查對臣等伏查各部院議覆事件副本內不載案呈  
日後案牘繁多難以查核應將各部院議覆副  
本與通政使司送進原題副本聯合一處專派  
滿中書二員漢中書四員敬謹收掌但漢中書  
舊額三十六員於康熙三十八年裁去八員今  
存二十八員分派票籤房本房以及稽查各部  
院註銷案件繕錄抄寫各項事務人員不敷  
請復設漢中書四員以敷分派辦事之用從之

又定大學士尚書品級

諭旨向來大學士尚書俱係正二品今大學士著授為正一品尚書著授為從一品

又吏部議雲貴廣西總督鄂爾泰奏雲南永昌道請改為分巡迤西道其迤東地方請添設分巡迤東道如蒙

俞允分巡迤東道員缺請以元江府遲維璽陞補奉旨遲維璽准其補授分巡迤東道餘依議

九年

諭曰我國家膺圖受命則有佐命元臣際會風雲開拓疆宇至於承平之世亦有勞臣宣力綏靖不庭凡厥鴻猷駿烈焜耀旂常於是酬庸獎功賜以公爵其中分為一等至二等三等所以第其勲勞表其閥閼同於古者河山帶礪之盟爰及苗裔永久勿替甚盛典也朕考古封爵之制漢唐以來公侯皆繫以郡縣之名而漢世功名顯著者則加以美號如信武冠軍建忠定遠之屬並以

榮名垂光史冊本朝封王者皆選用嘉美字樣其嗣襲封則因之而公爵則但分等次未有封號字樣朕意欲考其當日勲庸錫以嘉名追嘉為某公使勲勞之臣顯功丕績常赫赫在人耳目間而其子孫承襲封號亦皆顧名思義共加奮勉世為國家効忠抒力期踵美前人之光以副朕褒念勲庸之至意至於宗室外戚則仿古恩澤侯之例命為奉恩公或承恩公以昭寵錫其如何命名定制並將歷來功臣勲戚加錫美號之處該部詳

察定議具奏尋以部覆

欽定一二三等公爵為號凡十曰褒績忠達奉義超武雄

勇果毅信勇建烈勇勤英誠

十年設杭州駐防蒙古八旗每翼防禦二員從杭州將軍阿里衮請也

又吏部議奏八旗都統印房筆帖式五年効力期滿調補部院者向未議定何等品級現在俱用為無品筆帖式請照八旗左右二司筆帖式之例定

為八品令其食俸從之

又

諭兵部八旗都統朕看滿洲武舉武進士等於六旗營不甚相宜若與六旗官員一體擢用恐於營務未諳亦且壅滯嗣後伊等如何陞轉補用爾等會同詳議尋議八旗滿洲蒙古武舉武進士內除蒙

特恩選用外伊等應得之缺補用但伊等應補品級不同則陞用亦宜分別嗣後將滿洲蒙古武舉照漢人

武舉例會試後請大臣驗看才優者列為一等於  
護軍校驍騎校等缺挨次委署試用行走三年入  
於驍騎校人員內補授平常者駁回該旗再此等  
人員係實授者自有應得之俸嗣後內九門千總  
缺出請照外七門千總例從之

十一年兵部議覆湖廣荊州將軍袞泰條奏各省  
駐防協領以下官員向例俱係本旗人員補授承  
辦事件不無瞻顧掣肘等弊嗣後請照京城例設

立副員於本翼內揀選佐領調旗委署副協領揀  
選防禦驍騎校調旗委署副佐領此委署人員仍  
照原品食俸俟有協領佐領缺出即將委署之員  
送部引

見補授再於領催前鋒內預行保舉記名調旗委署副驍  
騎校如記名人員不足即將未經保舉之人揀選  
委署給與八品頂帶仍食本身錢糧遇有驍騎校  
缺出將已經保舉領催前鋒奏請補授其未經保

舉之領催前鋒送部轉交該旗帶領引

見至出兵人員補授之缺仍照例委員署理並委副員協辦從之

十二年吏部議覆詹事府詹事顧祖鎮條奏

起居注衙門止滿主事二員請增設漢主事一員於舉人進士出身之現任中書內揀選引

見補授從之

皇朝文獻通考卷七十七

欽定四庫全書

史部

皇朝文獻通考卷

七十八至  
八十一

內閣中書<sub>臣</sub>寶汝翼覆勘

總校官中書<sub>臣</sub>孫溶

欽定四庫全書

皇朝文獻通考卷七十八

職官考

官制

乾隆元年總理王大臣議奏封爵之制成周以來  
列爵惟五秦漢時爵二十級並非世職其世襲者  
惟有侯爵分縣侯鄉侯亭侯三等至於唐宋並依  
周制

本朝定制公侯伯之下未立子男之爵別列五等世職以視古法尤為隆備但未定漢文名稱今敬擬精奇尼哈番一等者漢文稱為一等子二等者為二等子三等者為三等子阿思罕尼哈番一等者漢文稱為一等男二等者為二等男三等者為三等男阿達哈哈番漢文稱為輕車都尉仍分一等二等三等拜他拉布勒哈番漢文稱為騎都尉拖沙喇哈番漢文稱為雲騎尉從之

七年

命王大臣總領樂部並汰太常寺樂員

詳見樂考

十三年

諭曰向來各衙門京堂員缺屢經酌定其中仍不免於參差如僉都御史則有漢而無滿員左參議則滿員有二而無右參議大理寺少卿少詹事則滿一缺漢二缺太僕寺少卿則滿二缺國子監司業則滿二缺漢員俱止一缺於官制均未允協今既新定會典以

上參錯不齊各員缺應作何裁改更正之處著該部  
定議具奏尋議都察院裁僉都御史一缺通政司裁  
漢右通政一缺改滿左參議一缺為右參議大理  
寺裁漢少卿一缺詹事府裁漢少詹一缺太僕寺  
裁滿少卿一缺國子監裁滿司業一缺從之

又

諭大清會典開載內閣滿漢大學士員缺無定出自簡  
在等語本朝由內三院改設內閣大學士未有定數

自是官不必備惟其人之意而康熙年間滿漢大學士率用四員至雍正年間以來多用至六員更或增置一二人協辦朕思內閣居六卿之首滿漢大學士應有定員方合體制嗣後著定為滿漢各二員其協辦滿漢或一員或二員因人酌派又大學士官銜仍兼殿閣會典所載中和保和文華武英四殿文淵東閣二閣未為畫一其中和殿名從未有用者即不必開載著增入體仁閣名則三殿三閣較為整齊再大

學士缺出定例請旨開列亦有遲至一月後始行請  
旨者朕思大學士職司贊襄如其宣力有年遇有病  
休病故不忍遽行開列應俟至一月以後乃國家眷  
念舊臣加恩輔弼之意若緣事降革則機務重地未  
容久曠自應即行開列不必請旨將此載入會典永  
著為例

裁行人司衙門歸禮部辦理通政司裁滿洲漢人  
參議各一人內閣中書裁漢人二人

十四年

諭曰我朝定鼎以來酬庸賞功列爵惟五分等惟三以表世闕而第宏勲雍正年間因公爵居五等之首仿古封號字義錫以嘉名此誠篤念勲舊俾奕世子孫承襲者顧名思義意至厚也但封爵之制公侯伯一體優崇前代侯則有冠軍定遠之稱伯則有誠意威寧之號今公爵令名炳著而侯伯僅分等次似屬闕畧朕欲推廣其意凡我朝所封侯伯考厥成勞追加

美號庶伊後人感念乃祖乃父之忠勤紹修令緒國家實攸賴焉至子男同位自古以地為號未有別封可仍其舊該部妥酌定議以聞尋擬進

欽定侯爵為號凡七曰奉義恭誠順勤順義昭武延恩敦惠伯爵為號凡十有一曰翼烈宣義襄寧昭毅威靖襄勤誠毅昭信懋烈誠武勤宣

十六年定恩騎尉世職官

臣等謹按順治九年奉

恩詔凡陣亡人等之子孫襲次已完者賞給七品官世職至是奉

詔自順治九年後其有襲次已完之陣亡子孫俱賞給世職官定名為恩騎尉

十八年

諭曰國家設官分職期於有裨實政若同一官而差分階級膺此任而兼帶他銜於官制體統殊為未協如翰林部曹小京官補用御史既經簡擢同列諫垣即

應無所區別乃舊有五品六品之分試俸不試俸之異又如各省道員例以布政使司叅政叅議按察使司副使僉事等銜分別兼帶但道員職司巡守以整飭吏治彈壓地方為任至於錢穀刑名則藩臬司專責各有攸司且知府以下悉其統轄兼叅議僉事銜者階秩反卑其何以表率此皆舊例相沿宜為變通以歸畫一而重職守嗣後給事中著仍為正五品御史仍改為從五品不必試俸直省守巡各道著俱為

正四品停其兼銜其道員俸深應如何銓叙之處該部定議具奏尋議覆道員外陞按察使照舊通行開列具題補授至內陞京堂向例兼參政銜者陞太常寺少卿鴻臚寺卿兼副使銜者陞太僕寺少卿通政使司參議兼參議僉事銜者陞光祿寺少卿鴻臚寺少卿品秩懸殊毋庸以道員陞用外餘悉一體陞用從之

二十一年

諭曰吏部議覆白鍾山所奏曲阜縣知縣改為題缺一  
本闕里為毓聖之鄉自唐宋以來率以聖裔領縣事  
夫大宗主鬯既已爵列上公而知縣一官專以民事  
為職奉法令則以裁制傷恩厚族黨則以偏私廢事  
甚至因緣為奸簠簋不飭者有之且亦非古人易地  
而官之道我國家尊崇

先聖遠邁前朝廷恩後葉有加無已豈於此而有靳焉  
但與其循舊制而致瘵官有乖政體何如變通宜民

俾吏舉其職民安其治於邑中黎庶孔氏族人均有  
裨益著照該部議行其現任世職知縣既已謝事若  
歸部改銓不過恩及其身而止於朕心猶有未愜著  
加恩授為世襲六品官仍令揀選充補用副朕重道  
崇儒至意

二十四年時以準部蕩平伊犁等處內屬議准督  
臣楊應琚奏移安西提督駐巴里坤於沙州安西  
柳溝靖逆赤金五衛地置安西府領淵泉玉門敦

煌三縣移駐安西道於哈密以一府三縣屬焉

二十五年

諭曰現今招撫來京駐劄之葉爾羌喀什噶爾等處回人內其厄塞音既經晉秩公爵麻穆特圖爾都和卓授為扎薩克著作理藩院屬其餘金匠音樂回人等各回人著統編一佐領將拜和卓授為佐領令其管轄作為內務府屬嗣後送到回人俱著入於此佐領下尋准設佐領一人隸於內務府正白旗

二十七年辦事大臣阿桂等奏於伊犁設二佐領以厄魯特侍衛等往領之

臣等謹按伊犁回部盡入版圖

皇上睿謨周詳

命大臣前往辦事建置各官復因其舊俗設立伯克等官至周至密此復編為佐領比之八旗蒙古洵盛烈也其各官詳列後本條下

二十八年烏魯木齊為天山北路總匯要區自西

陸平定議駐兵四千名屯守其地增設副將一員  
酌分安西提標兵丁一千四百餘名分左右營其  
他營願往者聽至是兵丁陸續加增陝甘總督楊  
應琚疏請更立一營為城守三營峙立總理稽察  
責任匪輕應將副將改為總兵並增設鎮標中營  
以符營制統聽巴里坤提督節轄從之

又

諭曰朕閱續文獻通考館所進職官考內有應增改數

處俱經逐一指示發交該館參考訂正其有一二條沿襲舊文於官制未協者所當斟酌釐定以符體制如四川總督條下註明兼巡撫事而直隸總督向無巡撫兼銜書內亦未註出但巡撫於地方一切考察核轉皆其職任直隸現在既不設巡撫且所管通省事宜與四川總督無異嗣後直隸總督官銜著照四川總督之例添列兼管巡撫事務至外省知府向為正四品而巡道各視兼銜為差等則有三四五品之

不同今道員既經裁去兼銜統為正四品知府乃其所屬自應量為區別著將各省知府改為從四品封典內旗員武職六七品有封承德郎文林郎者名義亦覺未當應照漢官武職之例六品改為武信郎七品改為奮武郎但漢官武職至七品而止所有旗員之八九品武職仍照舊制為修職郎登仕郎庶名實相符而官制亦為允協俱著該部遵照辦理並諭令會典通考等館一體改正

移駐巴里坤提督於烏魯木齊改設烏魯木齊總  
兵於巴里坤時烏魯木齊地廣土腴分兵屯駐設  
副將一員並

特旨令內地民人攜家赴墾兵民羣集勢成重鎮是年  
二月改副將為總兵分立三營至是兵部議准督  
臣奏移巴里坤提督於烏魯木齊其原設總兵應  
移駐巴里坤所設弁兵悉令互改分轄

二十九年

諭曰前因西陲辦理軍需令陝甘總督駐劄肅州以便  
調遣迄今大功久竣新疆屯政亦已酌定章程而該  
督仍駐肅州距西安會城較遠於腹地屬員案牘控  
馭轉多隔礙朕意若將總督移駐蘭州巡撫原署則  
東西道里適均不難居中節制而甘肅巡撫亦可裁  
汰當經傳諭楊應琚令其熟籌妥議今據覆奏與朕  
所見昭合著將蘭州巡撫衙門改為督署令該督移  
駐並兼管撫事毋容更設巡撫所有原設撫標即改

為督標其舊設西安督標改為提標即令固原提督  
回駐西安管轄至所奏河州鎮總兵改為固原總兵  
並摺內條議各標營弁兵一切裁汰撥給事宜該部  
詳悉定擬具奏尋議陝甘總督回駐蘭州固原提督  
改駐西安俱為地處適中甘肅巡撫即行裁汰固  
原係平涼重鎮即將河州鎮改駐其地河州改設  
副將以花馬池協標移駐其花馬池改設參將以  
地僻事簡之鎮番營移駐又於蘭州增設城守營

以資巡防應以甘肅靖遠下馬關參將等官改駐  
得

旨允行

臣等謹按陝甘改駐總督提鎮控制邊陲星羅碁  
布洵為因地制宜至於營制兵弁或存或汰經畫  
完善事詳兵考茲不具載

又兵部議准雲貴總督吳達善奏雲南猛戛地處  
極邊現在土目刁希錦等俱為夷衆悅服應將刁

希錦給與土千總銜刁成秀給與土把總銜以示  
鼓勵

三十年

諭曰巡視臺灣御史前已降旨三年簡派一次事竣即  
回毋庸駐留候代今思該處現有道鎮大員駐劄一  
應地方事務俱可隨時經理而向來巡察御史在彼  
並未聞有所建白原屬有名無實若遽行裁撤則地  
方官或以遠隔海洋無人稽察日久不免廢弛亦不

可不防其流弊嗣後屆三年請派該衙門仍照例奏請或暫停派往或數次後派員一往巡查候朕隨時酌量辦理其盛京五處分班簡派稽察亦照此例行三十一年大學士公傳恒等奏各直省舉人挑入一等者共八百五十名分發各省以知縣用仍照原議准補陞調遺缺其直隸州州同州判府屬州同州判府經縣丞鹽庫等大使亦准以原銜借補其二等之一千一百五十名以教職銓用應請將

訓導復設訓導一併准其借補奉

旨依議

臣等謹按此因選途壅滯

特派王大臣等揀選八百餘員帶領引

見按省分發以知縣補用並准以原銜借補州倅縣佐  
等官督撫等可量材錄用以收指臂之效仰見

皇上遴擇人才疏通官職至意

又兵部議準雲貴總督楊應琚奏土目傾心相繼

輸誠所有猛勇頭目召齋召溪喃給土千總銜歸  
普洱鎮普洱府管轄猛竜沙人叭獲給指揮同知  
銜歸臨元鎮元江府管轄補哈頭目噶第牙翁給  
土千總銜整賣頭目召齋約提景線頭目叭賽給  
宣撫司銜景海頭目召罕彪六本頭目召猛齋均  
給土守備銜猛撒頭目喇鮓細利給土千總銜均  
照例准令世襲

加正一真人三品秩奉

諭曰正一真人向係承襲一品前據左副都御史梅穀成奏請量加裁抑經大學士會同該部議覆降為五品第念其自宋元以來承襲已久世守道教即遇有過愆亦應抵其人以罪耳不應議及其世襲也然舊例一品班序未免太優遽降五品又未免過於貶損且其法官婁近垣現係四品而伊品秩轉卑亦覺未協今正一真人既來朝進京著加恩視三品秩永為例

大學士公傳恒等議刪哈爾總管巴爾品奏達里  
岡愛牧廠請設四品蒙古總管一員由牧羣翼領  
內揀選引

見簡用其達都達布遜諾爾牧羣所有翼領等缺酌請  
裁汰於達里岡愛添設翼領二員新添牧羣內每  
羣牧長牧副各一員牧丁各八名均應如所請辦  
理並交該部另行鑄給關防應得養廉俸銀俱照  
例支給奉

諭旨依議

御史素爾訥奏各門城關以外地方遼闊請將各城吏目移駐城外各屬適中之地以便約束經吏部等議覆吏目微員移駐關外恐不足資彈壓應將副指揮移於城外東城則駐朝陽門外南城則駐永定門外西城則駐阜城門外北城則駐德勝門外並請另鑄副指揮印信其城內副指揮所轄地方改歸正指揮與吏目分管中城原未管關外

地方仍照舊經理從之

裁廣西小鎮安土巡檢設流官時以交匪潛匿廣  
西小鎮安地土巡檢岑繩武年穉無知失察土目  
總督楊廷璋奏請裁革專設流官以資彈壓從之  
裁雲南永北府缺增設迤南道大學士管雲南總  
督楊應琚奏永北向隸迤東道管轄相距寫遠鞭  
長莫及應增迤南道一員駐普洱將普洱及附近  
之鎮沅元江臨安四府地歸其管轄永北府知府

裁改掌印同知兼理地方從之

又奉

諭曰向來奉天府尹事務令盛京將軍兼轄今思將軍與府尹所屬旗民事件各有專司若令將軍節制於公務未免牽掣莫若照京城侍郎兼管順天府尹之例於盛京五部侍郎內派出一員管理永著為令

三十二年内務府奏新建泉宗廟聖化寺應設苑丞等官請於現有人員內品級職銜量為更易以

期充應各差至打掃地面坐更值宿之園戶園隸  
俱由

暢春園等處撥派可否懇

恩添給奉

諭暢春園等處現有園戶園隸二百餘名自應通融撥  
派毋庸另行添設

又

諭向來綠旗世職無承襲罔替之例第念官弁等果能

宣力効忠勲猷卓越則國家延賞酬庸誼無歧視前  
經降旨將黃芳度張勇等特予加恩准其子孫永遠  
承襲世職並令軍機大臣會同兵部詳查國初以來  
凡有功冊可稽者分別等差通行列名具奏請旨茲  
據覆奏內有殉節陣亡之張國彥等十七員又軍功  
較著之惠應詔等十四員核其事蹟或致命疆場克  
昭義烈或折衝閭外茂著勤勞均宜錫以殊施俾臣  
工共知激勸所有張國彥等子孫其世職有尚應承

襲者俟將來襲次滿日著加恩各賞給恩騎尉並准其世襲罔替

又大學士公傳恒等議御史王懿德奏本年

京察屆期翰林院學士及左右春坊庶子應俱入於四五品京堂內歸王大臣驗看列為等次分別去

留帶領引

見恭候

欽定奉

旨依議

三十三年

諭向來各衙門保舉撫民同知通判例由吏部請旨特派大員考試第思此項人員原不過取其通曉字義標判文書而止並非場屋衡文可比若一一傳集校藝恐其中轉易滋代倩傳遞諸弊甚屬無謂嗣後各衙門保舉此項人員彙送吏部照月選官之例令其赴部親筆繕寫履歷以憑核對不必另為派員考試

著為例

又

諭教職遇有懸缺向來率委別學教官代理此等司鐸  
微員兩任豈能兼顧現在各省有挑選二等舉人在  
籍候選教職之員伊等得缺尚遲如有情願及時自  
効者即赴本省督撫處報名遇有缺出需人聽候督  
撫會同學政挨次派委暫署則員缺既不致久懸而  
需次者亦不令閒曠自為一舉兩得該部即遵諭行

又

諭向來外省請簡文職各員俱特派大臣揀發而武職則止交兵部揀選引見嗣後遇有請發參將以上人員著兵部臨時奏派大員會同該部揀選帶領引見發往著為令

三十四年

諭向來萬善殿有年幼太監十餘人在內讀書派漢教習一員專司其課太監職在供給使令就使讀書不

過教之畧識字體何必選派科目人員與之講授令其通曉文字乎現今讀清書之太監等在長房一帶派內務府筆帖式課之此等讀書之人原可附近該處另選內務府筆帖式之曾讀漢書者授之句讀又何必為之專設一漢員教令讀書乎所有萬善殿派用漢教習之例著永遠停止

臣等謹按內使之職供給使令即讀書亦不過識文義通姓名乃前明壞政初猶內官監掌文籍尚

寶監掌圖書及永樂時已選教官入內教習宣宗時竟特開書堂聚至四五百人且令大學士陳山翰林朱祚等專司教習于是內官悉嫻文墨掌章奏照閣票批硃漸與外庭往來交結正統初即有司禮秉筆之事貽毒至不可勝言我

朝立法謹嚴一洗勝代陋習太監等惟令內府筆帖式課讀俾粗知字體

萬善殿漢教習一員一併裁之仰見

皇上方整肅防制盡善慎幾微之漸飭官府之規豈  
特遠越有明三代後無此良法也

三十五年

諭向來各省鹽政關差一年任滿例由該部院題請更  
換而關差內間有自行奏請並不經部辦理者究非  
體制嗣後除將軍督撫鹽政織造兼管各關仍由該  
將軍等照例自行題奏外其九江粵海等關將屆一  
年期滿並著一體報部聽該衙門具題請旨著為令

又

論向來吏部定例四品以上京堂降至六品以下者既無應補之京堂員缺又以京堂品秩優崇若補用司員與體制不合遂停其補用殊屬非是京堂品級雖優如因事獲譴既經予降自應按品授銓用人乃朝廷大權黜陟進退惟視其人之自取設官雖有崇卑示謫本無同異即由崇階而降為末科惟上所命孰敢抗違若拘堂不降司之說輒以曾膺高位不屑於

復就下僚是國家詔祿之典竟任臣下自專揀擇紀綱之謂何且以堂官降為司員於體制又有何碍而停其補用則此等人員一經錮級遂致擯錮終身所謂愛之適以害之於伊等亦復何益此皆相沿前明陋習不可為訓著該部另行改議具奏尋議京堂官降至六品以下照各項降官補用以畫一體制

三十八年設鎮西府及迪化州先是奉

諭勒爾謹奏巴里坤地方近來生息日繁兵民子弟敦

書講射漸已蔚然可觀照烏魯木齊迪化寧邊二廳  
封題代試之例專設學額一摺已批交該部議奏矣  
惟是該處民居稠密閭井殷繁兼之屬國來王征輶  
輻湊實為邊陲一大都會今既議定學額而原駐僅  
一同知尚於體制未合自應將巴里坤改設為府烏  
魯木齊改為屬州或將安西府移於巴里坤而安西  
為州並令統隸於邊郡規模尤為闊遠其應如何定  
制設官酌予嘉名及建立學校之處著大學士九卿

詳悉妥議具奏尋議遵

旨將巴里坤改設為府即以烏魯木齊為屬州所有哈密關展穆壘及附近設有職官之處並歸管轄以符體制查安西一府所轄淵泉玉門敦煌三縣其地距嘉峪關不甚相遠今巴里坤既改為府則安西更居內地應將安西府改為安西州直隸州知州其淵泉縣一缺即行裁汰所有該州應設學正吏目各一員即將淵泉縣訓導典史裁改其應設

州判一員即將原設馬蓮井縣丞改置分駐仍以  
玉門敦煌為屬縣巴里坤既改設知府應添附府  
知縣一員其應有經歷一員改為吏目仍管倉大  
使事並添設學正一員其原設寧邊城通判改為  
州同特訥格爾縣丞改為州判其附近之哈密通  
判闢展同知均歸巴里坤統轄至武職官員巴里  
坤現有總兵烏魯木齊現有提督安西現有參將  
均足資統轄控制無庸更易所有巴里坤改設府

縣及烏魯木齊改州應予嘉名臣等謹酌擬字樣  
另繕清單恭候

欽定奉

旨依議府州縣名

欽定為鎮西府宜禾縣迪化州

四十一年

諭昨四庫館呈進袁集永樂大典散篇內有麟臺故事  
一編為宋待制程俱撰具詳當時館閣之制所載典

掌三館秘閣書籍以執政領閣事又有直秘閣秘閣校理等官頗稱賅備方今蒐羅遺籍彙為四庫全書每輯錄奏進朕親披閱釐正特於文華殿後建文淵閣棄之以充策府而昭文治淵海縹緲蔚然稱盛第文淵閣國朝雖為大學士兼銜而非職掌在昔並無其地茲既崇構鼎新琅函環列不可不設官兼掌以副其實自宜酌衷宋制設文淵閣領閣事總其成其次為直閣事同司典掌又其次為校理分司註冊點

驗所有閣中書籍按時檢曝雖責之內府官屬而一切職掌則領閣事以下各任之於內閣翰詹衙門內兼用其每衙應設幾員及以何官兼充著大學士會同吏部翰林院定議列名具奏候朕簡定令各分職繫銜將來即為定額用垂久遠尋議查宋制秘書省有檢閱文字官係不常置應請酌仿其制再設文淵閣檢閱官於檢曝書籍時詣閣點閱更足以昭慎重於是定文淵閣領閣事二員以大學士協辦

大學士翰林院掌院學士充之提舉一員以內務  
府大臣充之直閣事六員以由科甲出身之內閣  
學士由內班出身之滿詹事少詹事讀講學士漢  
詹事少詹事讀講學士充之校理十六員以庶子  
侍讀侍講編修檢討充之檢閱八員以內閣中書  
充之

又

諭向來奉天所屬州縣原係滿漢人員兼用嗣因府尹

蘇昌等於辦理流民案內奏稱奉天各州縣凡詞訟等事關涉旗民者俱會同旗員審理往往意見參差若將旗員銓選較為畫一等語經軍機大臣議覆降旨允行今思奉天地方旗人居處者多旗員在彼不無沾涉親故遇有審理事件恐不免心存偏徇嗣後奉天各州縣缺出著照各省仍以滿洲漢人通用惟是奉天地方兼管旗民較為繁劇初任之員恐難辦理裕如所有各州縣缺出應交該部於候補人員內

揀選引見候朕簡員補用

又禮部議奏查熱河七廳應試童生分額取進統  
歸道學應如該督等所奏准其總設道學教授一  
員得

旨允行

四十三年奉

諭向來步軍統領衙門設有協理刑名部臣一人參酌  
刑律原以步軍統領或從武職簡放於一切刑名律

例未及周知是以酌設協理以資參核今步軍統領  
係朕簡用部院內親信大臣遇有刑名事件皆能自  
辦無所用其參酌且協理所辦刑名不過杖罪以下  
之稿又大抵隨同畫諾初未嘗置可否於其間殊屬  
有名無實嗣後步軍統領有由都統等官簡放者該  
部聲明請旨簡派其由尚書侍郎簡放者即不必復  
派協理之員所有原派之侍郎阿揚阿即無庸協理  
著為令

四十七年

諭吏部議覆欽天監條奏五官正等官分別陞用之例  
一摺其蒙古五官正一項人員陞途久滯用之理藩  
院尚屬通融之一法至請照小京官筆帖式之例遇  
有才具出衆之員一體保送撫民理事同知通判其  
事斷不可行此等蒙古人員在監行走原以推算測  
驗為事素非通習吏治與各部院衙門筆帖式等官  
不同其有年久熟諳推算者尤宜留於本衙門酌量

陞用若一例保送同知通判等官分發試用在外省  
既增一不諳民社之員而在該衙門反少一推算熟  
手於量才授職之道兩無裨益吏部議准此條明以  
欽天監係六阿哥管理未免意存遷就尤屬非是吏  
部堂官著交都察院議處

四十八年

諭向例總督俱兼兵部尚書右都御史銜巡撫俱兼兵  
部侍郎右副都御史銜但漕運河道總督並無地方

之責究與各省總督不同況又有由道員陞署及簡擢初任之員若一例兼銜未免太優不可不量為區別嗣後漕運河道總督該部俱奏請給與兵部侍郎銜著為令

五十年

諭滿洲由科目出身為翰林者本應認真讀書通達事理為國家有用之才方各稱其實向來滿洲之習舉業者其文義本屬淺陋及倖登科目列名翰苑問以

文學則曰身係滿洲豈漢人可比及至問以清語騎射又曰我係詞林豈同武夫戰卒兩處躲避進退失據而落於無用之流朕所深惡即從前尹繼善鄂容安鐘音觀保等在翰林中俱稱出色者止能隨常辦事而於邊疆重務並不能經理裕如雖其中鄂容安曾膺軍旅重寄臨危遇變亦惟知一死塞責究於國家大事何所裨補耶此次考試翰詹朕嚴加甄別滿員出缺甚多除簡擢數人外餘竟無員可補與其濫

筭充數毋寧核實酌裁所有現出之侍讀侍講學士  
二缺侍讀侍講二缺已另降旨裁汰嗣後滿洲人員  
益當自知愧勉讀書敦行砥礪成材以備國家器使  
如果能蒸蒸日上變從前積習人材蔚興彼時朕  
自當再補還舊額也

五十一年

諭三通館進呈皇朝通志職官畧一門朕詳加披閱其  
中所載文武官階諸多未協國家設官分職文武兼

資在文職則內而閤部院司外而督撫以至守令丞尉階級等差互相維制至武職為國干城同膺心膂之寄其階級自應與文職相埒方足以重閭寄而勵戎行今志內文職則係正一品起而武職則係從一品起既顯然少予一階且文職自正一品至從九品共十八階武職自從一品至七品止十一階多寡顯有懸殊體制即暗為隆替非所以著朝章垂令典也大抵議定官制編纂志書多出於文臣之手其意在大抵

乎重文輕武殊不知國家設立武職原欲其折衝捍衛其責並不輕於文臣有明之季文臣用事於中武臣宣力於外一二臺閣本兵科道書生構謀倡議俱足以掣武臣之肘卒至武備廢弛疆圉孔棘國事遂不可為此皆重文輕武之流弊不可不引為殷鑒所有武職人員現在所缺正一品之階應照朕前次欽定領侍衛內大臣將軍為正一品之例增入一階其自正七品以下較文職所少之五階亦應於內外武

職衙門微末員弁內按其職守酌定正從照文階一體釐正以昭畫一再志內載舊例武官正從一品俱封榮祿大夫正二品至從五品俱封將軍既未為允當嗣更定新例則皆稱大夫因思將軍為專閫主帥大夫係文臣之稱乃舊例則封將軍而今又更封大夫名義殊覺混淆嗣後武職正一品至從二品俱應封為將軍正三品至從九品應分別酌與都尉騎尉校尉等字樣遞為差等以示區別至向來文職遇有

降級處分如降一級者俱以正從計算止於正降為  
從而武職則降一級即降一品辦理既不畫一而武  
職官員遇有處分即官階較大者轉瞬即降至末弁  
相形未免偏枯嗣後武職處分亦應照文員之例以  
正從核計議降庶為平允夫文武初無輕重官聯要  
於整肅必當詳為更正較若畫一載入典章所有一  
切增改事宜著軍機大臣會同大學士吏兵二部詳  
晰定議具奏尋議查武職品級自正一品領侍衛內

大臣起至從八品止共十六階又自從一品提督起至正七品止共十一階較之文職十八階似覺參差惟文職之十八階係合內外統計始有此數武職合內外統計本有十六階較之文職少正九從九二階自應遵

旨增設查八旗有藍翎長太僕寺委署固山達向無品級今擬將藍翎長作為正九品太僕寺委署固山達作為從九品又綠營七品以下未經設有官階

查有經制外委千總外委把總及額外外委亦向  
無品級今擬將經制外委千總作為正八品經制  
外委把總作為正九品額外外委作為從九品增  
入官階內外合計以足十八階之數與文職相埒  
至各省駐防將軍舊例列入正一品嗣於乾隆三  
十二年奏明改為從一品查外省文職總督品級  
係從一品武職將軍亦列從一品則外任文武統  
率大員品制相當應仍從其舊其降調處分如綠

營之提督至參將游擊本有正從遇有處分原得  
以次遞降至都司以下等官有正無從遇有處分  
降一級即降一品似覺偏枯但查此等官職當其  
擢用時陞一等即陞一品是以降調時亦照此遞  
降是升降亦屬適均且八旗等官降調向係分別  
滿洲蒙古漢軍指有一定應補之缺營制各殊不  
能按級計算通融互降是以於乾隆三十二年奏  
准旗員降補俱照指定應補之缺補用無庸分別

正從今請仍照奏定章程辦理至

封典名號文職武職均稱大夫體制誠有未協謹遵

諭旨一二品俱封為將軍三四品俱封為都尉五六七

品俱封為騎尉八九品俱封為校尉其所增品級

係就內外營制現有職任名目酌量添入並未增

設官職是以一應陞遷俸祿錢糧等項俱仍照舊

例恭候

命下纂入例冊遵行並增入會典移咨三通館將職官

畧一體增定奉

旨依議

臣等謹按三通館承纂各門體例俱遵

旨纂至五十年止此次畫一内外文武官階於五十一年甫經議定奉

旨遵行仰見

皇上揆文奮武設官分職内外兼資體制合一之至意自經議奏准行即永垂典則從此品秩均平既洗

前代畸重畸輕之陋習用昭千古相維相制之大經於

國典

朝章實有闡繫今會典既奉

命增入謹加案聲明云

皇朝文獻通考卷七十八